



Дилбар Донабоева

# ТОНГГИ ШУДРИНГ

ШЕЪРЛАР

ДИЛБАР ДОНОБОЕВА

# ТОНГГИ ШУДРИНГ

ШЕЪРЛАР



ТОШКЕНТ - 2009

Қўлингиздаги мўъжаз шеърлар тўплами она-табиатга меҳри тўлиб тошган муаллиф Диљбар Донабаеванинг қалб ҳиссиётларидан бир томчи холос. У ҳаётни, тонгни севади. Унинг кетиб қолмаслигини оқшомгача ҳам ва яна, туни билан бедор кутишига ҳам тайёр... Бу унинг романтикаси ўта бой экани, бағри кенг, меҳри дарё аёл эканидан далолат беради. У одамларни умрни беҳуда ўтказмасликка, унинг ҳар лаҳзасини қадрлашига чорлайди. Табиатдаги ҳар бир ҳаракатдан ҳаётий фалсафа қидиради. Яхшиларга ҳурмат, ёмонларга нафрат кўзи билан қарайди, эзгуликни излайди.

Биз муаллифга ижодий баркамоллик тилаб қолар эканмиз, шеърлари доимо тонгги шудринг каби шаффоф ва бегубор бўлиб қолишига умид қиласиз.

Набижон ҲОШИМОВ,  
Ўзбекистон Ёзувчилар уюпмасининг аъзоси.

© «Lider-press» nashryoti, 2009 yil.

© «QOXIZ» МЧЖ ҚК

МЕН ТУШИМНИ СУВЛАРГА АЙТДИМ...

Мен тушимни сувларга айтдим,  
Сувлар очи гулгун нилуфар.  
Мен тушимни тошларга айтдим,  
Тош деганим товланди гавҳар.

Мен тушимни айтсам қишлиарга,  
Оппоқ қорга эқди бойчечак.  
Мен тушимни айтсам қушларга,  
Зар пат ташлаб, айтгин дер тилак.

Мен тушимни айтдим майсага,  
Яшил нурдан қалбим қамашди.  
Тушларимни айтсам тоғларга,  
Олов пуркаб ўтлар туташди.

Мен тушимни осмонга айтдим,  
Камалаклар олди ҳушимни.  
Мен тушимни дўстимга айтдим,  
У сувга айт, деди тушингни.

ХОЛАТ

Тонг отади.  
Эриниб тураман  
Ва оғир пардани сурман.  
Чиқаман-у ҳаёт саҳнига,  
Ёз ролимни ўйнай бошлайман.  
Энг яхши аёлни тимсоли бўлиб,  
Энг яхши онанинг тимсоли бўлиб.  
Куламан, кўзимни ёшлайман,  
Монолог ўқийман ҳисларга тўлиб.  
Артист бўлиб, ролга кириб,  
Ишда ҳам шу аҳвол,  
Вазифам аниқ,  
Айтадиган сўзларим тайин,  
Ўз ролимни ўйнайман ёниб,  
Лек чизикдан чиқмайман.  
Қиийн!...  
Куёш ботди.  
Пардани ёпдим.  
Қоронғи кечага ёқаман чироқ,  
Шунча яшаб, бир савол топдим:  
Бошқа касб йўқмикан менга яхшироқ?

ҚУЁШ ЁНАР

Қуёш ёнар, ёнмоқда қуёш  
Бу сир эмас шивирламангиз  
Топинмангиз түкмангиз күз ёш  
Бу оловни ўғирамангиз.

Қуёш ёнар, ёнмоқда қуёш  
Тунларга ҳам саэртиб учқун.  
Шу оловга берингиз бардош  
Осмон бўлиб яшамоқ учун.

Қуёш ёнар, ёнмоқда қуёш.  
Тутунлари сузиди юрибди.  
Ачишганда осмон кўзлари  
Секингина йиглаб турибди.



ХАЁТ

Ёруғ кунларим дилхуш,  
Ойдин тунларим сархуш,  
Қайдасан күнглим?  
Йүқ энди қайфу ташвиш,  
Йүқ энди гапу миш миш,  
Барисин күмдим.

Бошқалар қайфурсинлар,  
Бошқалар улгурсинлар,  
Синмий диллари.  
Бошқалар гапирсингилар,  
Сүзларни шопирсингилар,  
Куймай тиллари.

Кунлик ташвишга сотиб,  
Мен ўзимни йўқотиб,  
Яшабман бекор.  
Ҳаёт қайта шайланиб,  
Мени яна айланиб,  
Келмас - ку такрор.



ОЙДИН ТУНДА

Тун эди ойдин,  
Дилхуш саболи.  
Куй келар қайдин?  
Шүхчан наволи.

Ухламай уйғок,  
Куйлаётган ким.  
Жилдирап булоқ,  
Тун тинглайди жим.

Күшлар уйқуда,  
Дараҳт мудрайди.  
Ойнинг аксини,  
Сувлар судрайди.

Осмон ҳайратда,  
Пирпирап юлдуз.  
Ухлар бу пайтда,  
Сершовқин юлдуз.

Аслида булоқ  
Куйлар уззукун.  
Кун билмас бироқ  
Билар эди тун

Шүхчан навонинг  
Сехрига мафтун  
Зилол булоқни  
Севар эди тун.

Ҳамма, ҳаммани  
Ухлатиб қўйиб,  
Тинглар булоқни  
Туйиб ва тўйиб.

## ТЕМУР ДАРВОЗАСИ

Бу дарвоза очиқ, ҳамиша очиқ  
 Бу ердан энг катта карвонлар ўтган  
 Бир бириң қувиб, бир биридан қочиб,  
 Бу ердан на давру давронлар ўтган.

Бу ердан гоҳ голиб, гоҳида мағлуб,  
 Амирлар, хонлару султонлар ўтган  
 Илм излаб - топиб чин мочиндан  
 Қалб күзлари очиқ инсонлар ўтган.

Йўловчилар тинмас кундуз кечаси,  
 Сангзор узанида тўфонлар ўтган.  
 Қонга чўмилганда Жиззах кўчаси  
 Бу ерда нолалар, афғонлар ўтган.

Қизил байроқ тикиб кўплар оғзига,  
 Ҳақиқат аталган ёлғонлар ўтган.  
 Бу ер дарозадир очиқ дарвоза,  
 Бу ердан баъзида "илонлар" ўтган.

Тўхта, эй, ўткинчи, тўхтагин бир зум,  
 Бу ер Темур номини этур овоза.  
 Ўтганларни эслаб кўзларингни юм,  
 Тушун, ҳамма ўтар, қолур дарвоза.

Бундан ўта туриб, ҳамиша ҳар он,  
 Қалбимда тұяман улкан фурурни.  
 Кимки ўтса бундан, яхшими омон,  
 Албат эслаб ўтган Амир Темурни.

КАМТАРИН ХАЛҚИМГА

Менинг камтаргина халқим, ўзбегим,  
Кўш қўш орзулари туташ тўйларга.  
Содда қалби билан йўл топа олар,  
Замон чалкаштирган, чигал ўйларга.

Худо ярлағаган кунларга етиб,  
Кўкси шамол кўриб, елкаси офтоб.  
Гапни катта демас ўзидан кетиб,  
Сиёсат талашиб қилмайди хитоб.

Меҳнатдан баҳт топиб энтикиб юрар,  
Дўпписини чаккасига қўяр қўндириб.  
Бахтини кўнглига беркитиб қўяр,  
Бирор иш бошласа қўяр дўндириб.

Эркин ҳаволардан нафасим эркин,  
Баҳтимдан ўргилай, мен ҳам ўзбекман.  
Ўзбеклигим энди айтмасман секин,  
Сизнинг бирингизман, мен ҳам сиздекман.

Тош келса кемириб, сув келса симмириб.  
Борни барча бирдек кўрамиз баҳам.  
Аслида шундадир бизнинг баҳтиимз,  
Ҳақиқий ўзбекдир юртбошимиз ҳам.

ГУЛ ФАСЛИ

Гул фасли бу муҳаббат фасли,  
Ер гуллайди, осмон гуллайди.  
Ишқ фаслида юраги бўшлар,  
Ҳаммадан ҳам осон гуллайди.

Гуллар, гуллар оддий гуллармас  
Ол мевадан нишонадирлар.  
Ким муҳаббат мевасидирки  
Муҳаббатга ишонадирлар.

Зада бўлди дил зимиstonдан  
ўам керакмас, севинчлар керак.  
Шўх кезаман қалб бўстонида  
Сўз керакмас ўпичлар керак.

Изимиздан тиқилиб қолар  
Шафтолилар ҳасса суюниб.  
Бизни кўриб ўрик бўзарар,  
Қизаради олма уялиб.



ХАЁЛ

Сиқимлади руҳимни тақдир,  
Бир сиқим тупроққа айландым.  
Кулиб сочди эттанча тахқир,  
Шамол элагида эландым.

Қаҳқаҳаси жаранглаб туриб  
Аччиқ күз ёши билан лойлади.  
Олов ўчогига жойлади.  
Күз очдим.  
Хаётман.

Не қувонч  
Түёлмай тикилдим кунларга.  
Қароғимда эриди қуёш,  
Томчи бўлиб томди тунларга.



АНЖИР

Баҳор келиб, боғлар яшнайди.  
Ранго ранг, кўз олгуч гуллари билан,  
Бу гулларда ажиб сирлар яшайди,  
Шивирлашиб ширин тиллари билан.

Бу сир севги сири яшириб бўлмас,  
Ҳар дараҳт ўз тилида сўйланаётир.  
Лек улардан бири ҳеч гуллай олмас,  
Бир чеккада маҳзун ўйланаётир.

Наҳот севги дарди унга юқмаган,  
Наҳот севгиси йўқ, ёки тили йўқ.  
Балки муҳаббатин тутади пинҳон,  
Кўринг бу дараҳтни, дона гули йўқ.

Балки қачонлардир гуллаган у ҳам,  
Кимдир гулларини ўғирлаб қўймиш.  
Меваларин кўриб, ҳангуманг,  
Баҳор хатосин ёз тўлаб қўймиш.



ТОНГ ОТДИ...

Тонг отди...  
Нимани отибди?  
Ён атрофга яхшилаб қаранг.  
Куни бўйи излайман энди.

Топарманми?  
Асаблар таранг.  
Балки гул отганdir,  
Балки мевадир.

Балки фафлат томон,  
Отган бир тошни.  
Мен овора сарсон,  
Ерда излабман,  
У эса отибди.  
Бизга қуёшни.

## ШАМОЛ

Шамол каби ёнимдан ўтдинг.  
 Сесканиб силкинди шохларим,  
 Сездирмасдан титради танам,  
 Илдизларим пинҳон зирқирадилар.

Кўзимга урилди нафасинг ўтли,  
 Ҳавода эриди оҳларим.  
 Лек хушнуд ва яна мақтаниб,  
 Япроқларим шодон ҳилпирадилар.

Сен эса борйуғи шамолсан  
 Ўз йўлида юрган ўткинчи.  
 Кенг осмон фарзанди - хаёлсан  
 Безовта қилмагин, ўтинчим...

Ўсаётган ўйларим чалкаш.  
 Кўз тикканим қўёш ҳам узоқ.  
 Туйгуларим нақадар саркаш,  
 Тунлари ҳам шовуллар уйроқ.

Бас демоқقا етмайди кучим.  
 Баргларимни юламан бир бир  
 Шамол, сенда бор менинг учим  
 Қандай олгум, ёзмаган тақдир...

Нечук осмон ранги бузилган  
 Ёдга тушдинг яна шамол феъл.  
 Йўлларга сочилган, тўзиган  
 Баргларимни супургани кел.

УФҚ

Табиатдан шундай олиб андоза,  
Уфқа тикилиб расм чизаман.  
Табиат кўзимга кўринар тоза,  
Қалбимда ҳаяжон, титроқ сезаман.

Нозик фунчаларни орзуларим деб,  
Бўяйман энг тиник, энг шаффофт рангта.  
Самонинг бағрида беғубор булат,  
Оппоқ қабутарни эслатар менга

Уфқа қизариб ботаркан қуёш,  
Таъсири мага қараб қоламан ўйлаб.  
Ёруғ бўлсин дея эртанги куним,  
Уфқни қизилга қўяман бўяб.

КУЗ ЁМФИРИ

Ёз бўйи унутиб ёмфирни  
Яшадим, вужудим қайноқдир.  
Бу қайноқ вужудда лек руҳим,  
Ташнадир, ташналик қийноқдир.

Қайдасан эй, баҳор ёмфирни,  
Мадад бер, мен сени кутаман.  
Олтиндан тўшайман поёндоз,  
Сарғайган гулдаста тутаман.

Мана у, қақраган лабимга,  
Томчилар узилар зўр-базўр.  
Бир оғриқ урилар қалбимга,  
Мунча шўр бу ёмфир, мунча шўр



БОГДА

Бу бөг кутубхона,  
Дарахтлар китоб,  
Япроқлар варақ.  
Анқор уни ўқиб, қиласы хитоб,  
Қушлар ўқишишмоқда уйғониб барвақт.

Бу бөг кутубхона, дарахтлар китоб,  
Хар варақда гүё қүшик битилган,  
Лек бу қүшик қушлар тилида,  
Ёмғирлар тилида,  
Анқор тилида,  
Шунинг учун бу боғда  
Куйлады улар.

Менинг ҳам куйлагим келади жуда  
Қушлар каби чаҳ-чаҳлаб,  
Анқор каби хайқириб,  
Ҳеч бўлмаса ёмғир каби шивирлаб  
Куйлагим келар.  
Лекин япроқларни шунча варақлаб  
Ҳеч ўқий олмадим,  
Уқий олмадим.

ЛОЛА

Баҳор менга узатади бир пиёла май,  
Ёниб турган муҳаббатнинг қайноқ майдан.  
Лекин афсус, ҳароратдан кўлимга етмай,  
Чатнаб кетди пиёласи тўртта жойидан.  
Ҳаёжонла қолиб кетдим ишқ саробида,  
Нега энди хафа булад, не учун гина.  
Йуқ, насибам бордир ахир ишқ шаробидан  
Қолибди-ку, ол япроқда бир томчигина

БЕШИНЧИ ФАСЛ

Дераза олдида туарар бир аёл,  
Кўз қараси сокин, қайфуси мубҳам.  
Панд еганми бехос, ё чарчоқ, беҳол  
Сержилва бағрига тортолмас олам.  
Мафтун қила олмай гул тўқди баҳор,  
Ёз мевалар боғин фақат у кезмас.  
Кўзнинг товланиши, кўз ёши бекор,  
Қор учқуни ўлдуз, фақат у сезмас.  
Шунда табиат ҳам қолди жим ва лол,  
Бир аёл қалбини ром этолмайин.  
Унинг юрагига йўл топиш маҳол,  
Бешинчи фаслни яратиш қийин.  
Лекин мен яратгум, ишлатмай бүёқ  
Ва хил хил мевалар тўкмасдан ерга.  
Гоҳ ийғлаб, гоҳида бўлиб дилсиёҳ,  
Аёздай кирмайман мен ҳеч қаерга:  
Фақат мен руёби бўлгум хаёлнинг,  
Чечаклар ўсади қалбларни ёриб.  
Энг яқин кишиси бўлиб аёлнинг,  
Бир оғиз сўз дейман ёнига бориб.

ШОХИНАГА

С.Есенин хотирасига.

Тун осмони каби күзларинг қаро,  
Ёниб ёниб күринади унда юлдузлар.  
Хаёлчан кезаман қаро тун аро,  
Уйларимга эса фақат кундузлар.

Тун осмони каби күзларинг қаро,  
Сөхрли эртаклар менга сүйлайди.  
Қаро күзларинг тиқилиб гоҳо,  
Фикрим кимларни дир бедор ўйлайди.

Тун осмони каби күзларинг қаро,  
Сөхрлайди мени кундан кун аммо  
Мен уни биламан, күзлари мовий,  
Қуёш нури билан ёришган само.

Тун осмони каби күзларинг қаро,  
Беун тикилади оламга тўйиб.  
Нечун яшаяпсан гўзал қаро кўз,  
Ҳамон қўёшингни қалбингга кўмиб.

ИЛТИЖО

Ватан тупрогини кўзимга суртдим,  
Қора экан қарогим бўлди.  
Йўл ёқалаб юрган дарахтлар,  
Чангга ботган оёғим бўлди.  
Гул сўрасам бермишлар тикан,  
Қайтармадим, яробим бўлди.  
Липиллайди хаста юрагим,  
Гуё сўнгги япрогим бўлди.  
Мени ташлаб кетма, муҳаббат!

Суянгандим бир улкан боғга,  
Тераклардан титроқ юқтиридим.  
Ишқ излаган дил телба бўлди,  
Ишқдан аввал фироқ юқтиридим.  
Оқу - қора ранглар ичида,  
Қораликни кўпроқ юқтиридим.  
Муҳаббатни дард деб тушундим,  
Шу сабабки гуноҳ юқтиридим.  
Мени ташлаб кетма, муҳаббат!

Ҳамма ёқдан оқ сўз ёғилди,  
Мендан ўзга ёмон қолмади.  
Тана дашном ўқлари тирён,  
Мендан ўзга нишон қолмади.  
Муҳаббат ҳам, нафрат ҳам ошкор,  
Бирор туйфу пинҳон қолмади.  
Севмас эдим бундай яшашни,  
Лекин ўзга имкон қолмади.  
Мени ташлаб кетма муҳаббат!

Кетсанг агар қайтиб келмагин,  
Келгунингча ҳароб бўламан.  
Мени эзмоқ қасдида бўлар,  
Келгунингча шароб бўламан.  
Далаларга ҳайдар бешафқат,  
Қишида қолиб яхоб бўламан.  
Келгунингча тор бўлгум балки,  
Бармоқларда музроб бўламан.  
Мени ташлаб кетма муҳаббат!

### АТИРГУЛ

Деразамдан бир гўзал қиз,  
Кузатади кечаю кундуз.  
Бир зумга ҳам кетмайди нари,  
Хаёлим ҳам унладир бари.  
Кундуз нурга чулғанар  
Оловланар, чулғанар.  
Тун.  
Осмонда ой кезар.  
Кўланкасин киргизар,  
Ўзи қолар, киролмас,  
Бетоқатдир, кўролмас.  
Кўзимга учрар таниш,  
Танишдир.  
Нега ташвиш.  
Шубҳага бермайман эрк.  
Шум хаёлга йўллар берк.  
Лекин бу қиз, гўзал қиз,  
Кўз тикиб менга унсиз.  
Деразамнинг тагида,  
Гул тутиб этагида.  
Нишларини бекитиб,  
Фақат кутар энтикиб.

## ШОИРНИНГ СҮНГТИ ШЕЬРИ.

Усмон Носир хотирасига

Дардимдан туғилган боламсан шеърим,  
Ичимга ютганим ноламсан шеърим.  
Сен учун дунёда яшасам арзир,  
Сен учун бир кураш бошласам арзир,  
Бошлай хиёнатта қарааш бир қарааш.  
Сўзини сотганлар чиқсин майдонга  
Билмай инсонликни не учун яшаш  
Ўзини сотганлар чиқсин майдонга  
Қайга кетяпсиз жаҳолат бу ком.  
Ўз юрт сотганлар чиқсин майдонга,  
Боболардан мерос ўзбек деган ном.  
Бахт - қўтни сотганлар чиқсин майдонга,  
Ярадор жангчиликдек инграб ёздим шеър.  
Ярадор жангчилик ўлимга иқрор.  
Бу фисқу фасотлар нима деса дер,  
Мен жанга кираман тақрор ва тақрор.  
Жароҳатдан томган қоним сиёҳдир,  
Шеър ёзмаслик энди мен учун гуноҳ,  
Кўнглим ердан ўстган содда гиёҳдир.  
Кўқданмас, тупроқдан излайди паноҳ,  
Тупроққа қоришиб ўлсам майдонда,  
Мени енга олса агар хиёнат.  
Қандай чидайман мен, қандай чидайман,  
Басирларга шеърим қолса омонат.  
Хиёнат ўлмаса, яшаса омон,  
Айланса дунёнинг суюклигига.  
Чидолмам, чидолмам ҳеч қачон,  
Қайта ўсиб чиққум суякларимдан.  
Ҳаёт нима ўзи, нимадир тақдир,  
Инсон инсонлигини билмаса агар.  
Шеърларим руҳига сингиб бирмабир  
Курашавераман қиёмат қадар.

## БОЗОР

Ҳаёт бозорида сотилаёттир  
 Бир оғиз сүз,  
 Бир сиқим сабр.  
 Виждон ҳозир жуда бозоргир.  
 Кимдир меҳр сотар.  
 Кимлардир жабр.  
 Ҳаёт бозорида сотилаёттир,  
 Чакчайган күз,  
 Уюлган қовоқ.  
 Табассуми қотган ғунча лаб  
 Бир жуфт үпка ёнида.  
 Сотилади юрак, яъни қалб,  
 Кун қизийди, бозор қизийди,  
 Расталарда далол изгийди.  
 Мен ҳам эл қатори кездиму бозор,  
 Сотиб олдим фақат кунлигимга озор.  
 Ҳарқалай кулбамга қайтаман омон.  
 Лекин бу бозорда пулли ҳамёндай.



ТОЛИМ ТОЛИМ ҚАРО СОЧЛАРИНГ

Толим толим қаро соchlаринг,  
Тарогидан сачраган юлдуз.  
Учқун отиб күйдирди мени,  
Соч тараса сен ўйлаган қиз.

Бу кун унинг қўлида қадаҳ,  
Қўшиқ айтар сен учун сархуш.  
Яни бир бор сен мени алда,  
Кел, мен билан бирга рақсга туш.

Кўзим ёши қўлди лиммо лим,  
Томчисини тукмай ичаман.  
Бутун сендан кечмоғим лозим,  
Мен ўзимдан бугун кечаман.



ЗАМОНДОШЛАР

Замондошим, замонага бок,  
Қарама қаршидир, қара түрт тараф.  
Яшамоқ маңноси асли курашмоқ,  
Курашиб яшашиб ҳәёттүй талаб.

Бугунги бегамлик эртага дарддир,  
Бугун сүз айтмасанг эртага кечдир.  
Бугун қаҳрамонлик аталган нарса  
Эртага ҳеч нарса, эртага ҳечдир.

Бугун тугунидир кеча - эртанинг,  
Тугун очилади, тугун тугинлар.  
Кечаю бугунинг талаби эрта,  
Ундовлар сўроқдек букилар.

Сиру синоатли бу ёруғ олам  
Умр бу фурсатли ёки иноят  
Ҳарқалай ҳушёрроқ яшагин, дўстим,  
Бугунги хатойинг, эрта жиноят.



ОЛОВ

Күзни алдашибди,  
Ёлғон беаёв.  
Одамлар ҳазилкаш  
Ва яна қитмир.  
Бутун ерни қоплаб олди деб олов  
Сода қулогига қуйибди кимдир.

Бор йўқ ёмғирларин тўкиб қолди куз,  
Одамлар, асранглар ўтни, оловни.  
Ёниб қолар деган умидда ночор,

ҲАЛИ БАҲОР ЭМАС...

Сойларнинг сувида сокинлик,  
Ел ҳамон аллалар дарахтни.  
Қуёш кенг осмонда муаллақ,  
Булутлар беҳолдир, карахтдир.  
Ҳали баҳор эмас.  
Қорайган хазонлар тўзғийди,  
Саргаяр қишинг оқ излари.  
Боғларнинг уйлари изғийди,  
Ўтган йил ёzlари, кузлари,  
Лек баҳори эмас.  
Ҳавонинг таъмида сезилмас,  
На қишу, на кўклам нафаси.  
Куртаклар тўтқиндир,  
Дарахтнинг  
Мустаҳкам шох шабба қафаси.  
Ҳали баҳор эмас...

ОҚИМ

Дарё келар олис тоғлардан,  
Чүққилардан тушган сувлар келади.  
Бошларини уриб неча тошларга  
Үзанлардан пишган сувлар келади

Дарёнинг бошида ўтирап булоқ,  
Юрагидан сизган ёшлар оқади.  
Дарёнинг тубида сезмайди бирор,  
Оқимнинг зўридан тошлар оқади.



УМР

Шабнамга бир оний умр берилди,  
Унда бор мангуга арзирлик мазмун.  
Тонг отмай борлиққа маржон терилди,  
Ерда фубор кўрмай қуёш ҳам мамнун.

Шамолга мангалик умр берилди,  
Ўз мақсадин ўзи билолмай гаранг.  
Гоҳ тўзон, гоҳ қуон бўлиб керилди,  
Қуёшга кўрсатиб Ерда гарду чанг.

## АЁЛ СЕВГИСИ

Севги сурма бўлса, қўзимга сурсам,  
 Севги бўёқ бўлса, лабимга боссам,  
 Ёки ёқут кўзли исирға каби  
 Безак билиб қулоққа оссам.  
 Севги узук бўлса, қўлимга тақсам,  
 Рўмол бўлса бошимга бойлагудек  
 Атлас кўйлак бўлса кийганда ёқсам  
 Авайлаб сандиққа жойлаб қўйгудек.  
 Аёл бўлармиди сурмасиз аёл,  
 Узуксиз, сирғасиз, рўмолсиз аёл.  
 Аёл бўлармиди севгисиз аёл,  
 Гар аёл севгисиз, увоздир аёл.  
 Аёлнинг севгиси кўзида,  
 Аёлнинг севгиси қулоғидаидир,  
 Аёлнинг севгиси сўзида,  
 Шамолга ёрилган дудоғидаидир.  
 Аёлнинг севгиси қўлларидаидир,  
 Ҳар кун нон ёпади ҳамир ошириб.  
 Аёлнинг севгиси бошида,  
 Қирқўрим сочини йифиб-яшириб.  
 Эрига тикилиб борар ҳар ўйга,  
 Ўйларини деразага михлаб қўяди.  
 Аёл севгисини кияди тўйга,  
 Ва яна авайлаб тахлаб қўяди.

## ЧАНҚОВУЗ

Чанқаган оғзимга чанқовуз босдим,  
 Энамни эсласам күзда ёшим бор.  
 Ўтмиш ҳасратини қулоққа осдим,  
 Қалбда армон деган қаттиқ тошим бор.

Энамни эслатди менга чанқовуз,  
 Мен мунис энамга ўхшагим келди.

У кунлар ёдидан дил доғда ҳануз,  
 Бугун энам учун яшагим келди.

Чанқовуз босаман чанқоқ оғзимга,  
 Энамнинг очилмай сўнган ўн гули.  
 Армоним тош бўлиб қелар бўғзимга,  
 Энам жанг кўрмаган солдатнинг тули.

Эна, яшадингиз бир умр ёниб,  
 Кимларни сўйдириб, кимни куйдириб.  
 Чанқовуз куйини ичаман қониб,  
 Армоним бўғзимда турар куйдириб.

Ким танимас эди "Боғча хола"ни,  
 Иш бошига кўпдан олдин етдингиз.  
 Бағрингизга босиб тўртта болани,  
 Яхши кунлар кутиб ўтиб кетдингиз.

Чанқаган оғзимга чанқовуз босдим,  
 Энамни эсласам күзда ёшим бор.  
 Ўтмиш ҳасратини қулоққа осдим,  
 Қалбда армон деган қаттиқ тошим бор.

ЙҮЛДА

Чайқалади яшил буғдойзор,  
Каттагина қишлоқ ёнма ён  
Хар юрақда яшайди озор,  
Бугун ким омондир, эрта ким омон.

Шаҳар томон узалган умид,  
Торайиб бормоқда ёлғизоёқ йүл,  
Йүл ёқаси очиқ буғдойзор,  
Буғдойдан ҳам қўнғирбошлиар мўл

Қовжираб пишади қўнғирбош,  
Чекка уватларда мунғайиб  
Кута кута бошоқларнинг сарғайишини,  
Одамлар етилар сарғайиб. . .

Ҳали замон яхши кун келар,  
Чайқалади ям-яшил бошоқ,  
Қўнғирбошни туяр келилар,  
Чайқалади қўнғиртус қишлоқ.



ҚҮНФИРБОШ

Отам эртагида бир бола яшар,  
Отасидан етим, онадан сағир.  
Күзимга күринар, уч ё түрт яшар,  
Күзимга күринар, эзилар бағир.

У яшар отамнинг хотирасида,  
Буғдойзор четида теради бошоқ.  
Қора кунлар унинг ўз отасидир,  
Қора тупроқ унинг онаси юмшоқ.

Ётли қарогида қора кун қотган,  
Ким билар бу кўзлар нени ўйлади.  
Жулдур кийимчалар суюгин ёпган  
Яна у: қўнғирбош, дея куйлади.

Чорраҳада қолиб йиглайди ҳар тун,  
Тошмехрлар эригунча йиглайди узок.  
Уни асраб ололмайди, ололмас ҳеч ким,  
Отаси қора кун, онаси тупроқ

Эртак охирини эсламас отам,  
Етаклаб кетдими қора отаси.  
Етиб келдими шу ёруғ кунга,  
Ё бағрига олдими қора онаси...

Отам юрагида яшар бир бола,  
Биз ўша юракдан кўтарғанмиз бош.  
Отам юрагида яшар бир нола,  
"Қўнғийбош, қўнғийбош, қўнғийбош..."

## ОЙБАРЧИННИНГ ҚЎШИФИ

Оқ тўшима сочим супурги,  
 Бу оҳимга сабабдир туртки  
 Эл ичидар балолар чиқмиш,  
 Эй одамлар, мени ким туртди.  
 Кур-хайт-а, қўр-хайт, тўрамнинг оти,  
 Ургандан ёмондир турткининг оти.  
 Ўз юртида хор бўларми эл,  
 Ўз тилига зор бўларми эл,  
 Индамадик, индамай юрдик,  
 Яна йўқдан бор бўларми эл.  
 Айбизиз бўлса эгиларми бош,  
 Қонлар бўлиб тўкиларми ёш,  
 Кўксингизда юракми ёки  
 Қотиб қолган битта чағир тош.  
 Юрибизими ўйсиз бош билан,  
 Диlda мудом алам, ғаш билан,  
 Юрагингиз суфириб олинг  
 Бошга уринг ўша тош билан,  
 Кур-хайт дейман, қур-хайт, тўрамнинг оти  
 Эшитсинлар зоримни аллар қаноти.  
 Етдим десам яхши бир кунга,  
 Ечим топсам қалбда тутунча.  
 Риё деган ўт тушди, ёндин,  
 Юрак бағрим тўлди тутинга  
 зга элни қабоҳат тутди.  
 Мен уларга кулганим йўқди,  
 Нечун эркин ҳаволаримда  
 Нафасимни шум хабар бўғди.  
 Кур-хайт дейман, қур-хайт, тўрамнинг оти.  
 Туёғингта темир михни ким қоқди?  
 Эл аллари сизга не бўлди,

Эркдай қутлуғ сүзга не бўлди,  
Тик қарангиз олдинги кунга  
Кўрмайсизми, кўзга не бўлди,  
Қур-хайт дейман, қанот боғлагин,  
Тутаган сабрингта сабот боғлагин.  
Душманинг эрк уйин бузмоқчи бўлди,  
Қайта қаср қургин бунёд боғлагин,  
Қур-хайт-а, кур-хайт, тўрамнинг оти,  
Ўзбекнинг эрк бўлар битта сифоти.

ОҚ ШЕЪР

Оппоқ шеър ёздим  
Ҳеч бир сўзни бўямадим,  
Фикрларни ҳам.  
Нарсаларни бир бирига  
Ўхшаттаним йўқ.  
Гуллар ерга боғланган  
Капалаклармас.  
Мен улар ҳидига  
Бўлганим йўқ масти.  
Лек бошим айланди салгина,  
Ой ойдир.  
Қуёшдир ҳамиша куёш.  
Бу шабнам гулларнинг исирғасимас  
Йўқ, айтманг.  
У асло эмасдир кўз ёш.  
Сизга суюнаман,  
Сизла яйрайман.  
Лекин сизни тоғ дегим келмас,  
Боғ ҳам дейман.  
Сиз мен учун ҳамиша сизсиз  
Шуниси яхшику аслида  
Мен эса мемман.  
Олдингиздан оқсан анҳор эмасман.

ЯЛПИЗ

Шаҳарга бир ўсмир келар энтикиб,  
Эрта туриб, ҳали кун чиқмай.  
Саватида хуш исли ялпиз,  
Қишлоғидан опкелар атай.

Кўчаларда ялпизнинг ҳиди,  
Одамларни тортгар ўзига.  
Битта кампир қўлига ушлаб,  
Пичирлайди, суртар кўзига.

Ўсмир бола шаҳар кезади,  
Кўлларида бир сават баҳор.  
У шаҳарга севинч улашар,  
Кўзларида олам севинч бор.

Бир ажнабий тиқилиб туриб,  
Бу нимадир, нечук гул дейди.  
Танноз аёл лабини буриб,  
Ялпизларинг неча пул дейди.

Ялпизлари кетар сочилиб,  
Содда бола қоқилар илкис,  
Пичирлайди, бу ахир баҳор,  
Бу пул эмас, бу ахир ялпиз.

ФАЛСАФА

Вақт чирпирап -  
Шүх раққос.  
Охангсиз куй, беовоз қүшик,  
Таъсирида ўтказаман кун.  
Рақс тушаман Вақт билан шодон,  
Ва сезиб қоламан кичкина бушлик.  
Пайдо бўлди кўксимда качон.  
Тушунолмай қоламан беун,  
Яшашнинг маъноси осмондай кенгу,  
Бирор чеккасидан бўлмайди ушлаб.  
Мен фақат ўзимни, ўзимни енгиб,  
Яшашим шарт энди  
Куйганман бошлаб.  
Не қилиб бўлсада яшашим керак.  
Кундан кун сехрли ҳаёт қўшиғи.  
Кенгайиб бормоқда кундан кун юрак.  
Кенгайиб бормоқда юрак бўшлиғи.

## ЯШАМОҚ

Яшаш қандай яхши...  
Қор ёғар унсиз.  
Хотирани оққа ўрайди,  
Қор тагида қолиб кеттган из.  
Бир қуёшли кунни сўрайди.

Яшаш қандай яхши...  
Оппоқ дунёning  
Битта чеккасидан боқдим қорайиб.  
Бошимдан тўкканча оппоқ қарғишлар,  
Осмоннинг кўзлари кетди олайиб.

Вақт ўтади...  
Бир кун қорлар кетишар  
Тутишиб куёшнинг этакларидан  
Кетишар воз кечиб далли девона.  
Бу дунёning ёлғон эртакларидан.

Яшаш қандай яхши...  
Хилма-хил ранглар.  
Тўлдирди сенумен билган анҳорни  
Изларнинг излари қолган тупроққа.  
Баҳорни экамиз, маъсум баҳорни.

ОМОНАТ  
(Адолат посбонларига)

Омонат дунёда сўз ҳам омонат  
Сўзга қараб қолган дўст ҳам омонат  
Лекин қонун деган буюк куч борки  
Ҳеч бир сўз тонолмас, қилмас хиёнат.  
Омонат дунёга елкасин туттган,  
Қонун посбонлари, бўлинг саломат,  
Дунёга инсон ҳам омонат келган,  
У билан ишқ, меҳрсадоқат келган.  
Инсонлар яшайди. Иймонувиждон,  
У билан риё ҳам хиёнат келган.  
Омонат инсонга елкасин туттган  
Номус посбонлари бўлинг саломат.  
Ватан тушунчасин сарҳади борми,  
Миллат чегараси қаердан ўтмиш.  
Эсланг Темур туғи туттган виқорни,  
У ўз авлодидан неларни кутмиш.  
Миллат ташвишига елкасин туттган  
Ватан посбон бўлинг саломат.  
Тинчлик Оллоҳ, берган эҳсондир бугун,  
Қушни эл осмонида сузганда тўтун.  
Оталар дуода қилишар такрор,  
Қалқон кўксингиз бўлсин омон.  
Оталар орзусига елкасин туттган  
Тинчлик посбонлари, бўлинг саломат.  
Бутун элнинг бутун назари сизда,  
Эл туттган ташвишнинг озори сизда.  
Порлок кунлар томон йўл тўтган карвон,  
Қадамларин туттган мадори сизда.  
Сиз омон бўлсангиз, омон адолат,  
Адолат посбонлари, бўлинг саломат.

## ҚАЛБ ОСМОНДИР

Қалб осмондир.  
 Кенг, бегубор.  
 Билғанлар доим  
 Қүёш бўлиб, оташ бўлиб киурулар унга.  
 Соф нурила силабсийпаб, суйиб мулоим,  
 Шундан ҳаёт айланмишdir ёп-ёруғ кунга.  
 Қалб осмондир.  
 Билғанлар бор, билмаганлар бор.  
 Кибор билан киришувлар мисоли бир ой,  
 Қоронғи тун йўлларида бўлишгач абгор,  
 Юлдузлардан мадад сўрар ул "тулин" чирой,  
 Осмондир  
 Эҳ, шамоллар бефайз, бекувонч,  
 Булутларни фийбатчилик қайдан йигдингиз.  
 Бу булутлар орасида йўқолди ишонч,  
 Тирқишилардан ҳувиллагач сохта йифингиз.  
 Қалб оосмондир.  
 Кани кимга топулур журъат.  
 Чакмоқ бўлиб чақнанг, титинг булутлар кўксин,  
 Ўзимиизга қолсин софу кенглиги фақат,  
 Аламга чидолмасдан булат ёш тўксин.

МЕН ТОНГНИ КУТАМАН

Тонгни кутиб бедор уйқум келмайды,  
Зеро ҳали тундир, қоронгу кеча.  
Билмадим, менинг каби тонгни кутарми  
Күкдаги түлин ой, юлдуз бир неча.

Юрагим увишиб кетар орзиқиб,  
Мен тонгни севаман ҳаётдан ортиқ,  
Мен уни кутаман бедор зерикиб,  
Унга йүғ борим этгумдир тортиқ.

Ахир тонг келмаса, келмайды кундуз,  
Одамлар күзини очмас уйкудан.  
Тун қўйнида мендай ким уйғоқ ёлғиз.  
Тонг келмаса, ўлиб қолгум қайгудан.

Одамлар, оқ тонглар келар оқариб,  
Faflatda қолмангиз, туринг, уйгонинг.  
Қора тун куйнида қолмангиз кариб.  
Сиз ёруғ ҳаётни симиринг, қонинг

Кечалари уйғоқ, тонгни кутаман,  
Ёруғ кунлар учун қилдим ибодат.  
Қора тунда кўрдим мен кабоҳатни,  
Қора тунда қолур қора хиёнат.

СЕН МЕНГА БҮЛДИНГ МАФТУН

Кеч қорайди.  
Чукди тун.  
Хаёлларинг пойига  
Сен сүкланиб қарадинг,  
Унинг юлдуз ойига,  
Сеҳрига бўлма мафтун.

Тунла бўлсанг ҳамсуҳбат,  
Юрагинг қолсин бутун.  
Мен-ла бўлмоқлик учун,  
Мен-ла қолмоқлик учун,  
Сен тунга бўлма мафтун.

Қора туннинг рангини  
Қароғимга жойлагум.  
Сенинг олов кўзингни,  
Кўз нурим-ла бойлагум.  
Сен менга бўлгин мафтун

Рашқданми, аламданми?  
Оқариб кетмоқда тун.  
Қаро тун оғушида  
Сен менга бўлдинг мафтун.  
Сен менга бўлдинг мафтун.

ТУН

Қаердандир кириб келди тун,  
Сир-сехрли ертакка ўхшаш.  
Тунд бўёқлар чаплашиб буткул  
Кўз ўнгимда тикланди хабаш.  
Ой ялтирап.  
Бир пой ҳалқаси  
Занжи учун, о нақадар зеб,  
Faфлат бутун уни алқасин,  
Фамларимга шерик бўлди деб.  
Тун судралар фамгин ва ҳоргин,  
Сув юзида сузгандек туман.  
Ҳаммасини унутса лекин  
Биргини сўз; "Қораманми ман?!"  
Кўз ёшларин ютади хабаш,  
Юлдузлари қалбга бекинди.  
Ва тонг қизи Дездимонанинг  
Оёғини ўпиб чекинди.

СОФИНЧ

Ёмғир ёғар йиглайди булат,  
Фақат шамол эркин елади.  
Ташвишларим бўлди унугт,  
Мен онамни кўргим келади.  
Йўллар узоқ, билет сотилган,  
Автобусга одам тўлади.  
Тикилганча қизгиш уфққа,  
Мен оманни кўргим келади.  
Қайтгим келмас бари-бир йўлдан,  
Софинчимга аlam қораман.  
Мана онам, хаёлчан қизинг,  
Тушларингта кириб бораман.

## ОРЗУИМ

Орзуим бор менинг юз йиллик,  
 Сарғайиб кетиби таҳларим.  
 Бўйидан уфириб туриби  
 Юз йиллик сандиқларнинг оҳлари.  
 Юз йилки бир байрам куттгайман,  
 Орзуимдан оқ кўйлак тиккайман.

Орзуим ўзига сингдирди  
 Замоннинг юз йиллик губорин.  
 Ювмоқقا эритиб тиндиридим  
 Юз йилда йифилган тоғ қорин.  
 Эй куёш, сен менга мадад бер,  
 Эй бардош, сен мёнга кувват бер.

Юваман қўлларим қавариб,  
 Давронлар гардини не замон.  
 Орзумни қўритиб бермокда,  
 Турналар солади ип-аркон  
 Турналар катори бузилиб,  
 Ип-арқон кетмасин узилиб.  
 Юз йилки бир байрам куттгайман  
 Орзуимдан ок кўйлак тиккайман.

Турмуш тўзонларида соврилар умрим,  
 Ўйу фикрим мисоли хас.  
 Кук томон ичди  
 Мен эса бир нафас муаллак турдим,  
 Сўнг ўзимга кайтдим.

Бўғдойдай тўкилдим,  
Кўксимни қучдим,  
Юрагимда ётиб ўса бошладим,

Хаёт неча керак бенур бесамар.  
Ўсавердим.  
Ёрдим ўз юрагимни.  
Ўсавердим кўк томон чўзилиб,  
Эркин учган ўйларим қадар.

### СЕН МЕНДАН ҚЎРҚМА

Сен мендан қўрқмагин,  
Чўғ каби сачраган сўзимдан қўрқма.  
Нигоҳимга тоғлар уқладим,  
Лекин ўлдиролмас, кўзимдан қўрқма

Сен мендан қўрқмагин,  
Юрибман хотиржам ўзим йўлимдан,  
Сени ўлдиришни хоҳдарман балки.  
Лекин келмас ишон, бу иш қўлимдан.

Сен мендан қўрқмагин,  
Қўрққин ўзингдан.  
Ўз бошинга ўзинг бало бўларсан  
Қўрққин ўзинг айтган сўзингдан,  
Айтган сўзларингдан адо бўларсан.

## КИТОБЛАР

Жавонда китобларим суюшиб бир-бирини,  
Махзун сукут сурадилар нимадандир ўйланиб.  
Кулга олиб варакларга ташласам кўз кирини,  
Сирларини очадилар шошиб-пишиб суйланиб.

Ўқийвериб-ўқийвериб эскитганман кўпини,  
Баъзиларин хали-хануз охорлари сақланган.  
Баъзилари уруш кўрган, кўрган душман ўқини,  
Баъзилари қамалган, яна кейин оқланган.

Ич ичига яширганлар сирли сўзни, ҳақ сўзни,  
Менга махзун кўринарлар, гёё кўнгли синикдир.  
Назаримда улар мендан узмайдилар ҳеч кзин.  
Улар мени кутадилар, улар менга интиқдир.

Унутиш бу йўқотишдир, фалокатнинг бошидир,  
Китоблар замонларга хотиралар ташийди.  
Варакларда излайман мен унугтан ўз сўзимни,  
Китоблардан излайман мен унугилган ўзимни.



## АХМАД ЯССАВИЙ ХОТИРАСИГА

Бир сўз бордир тошни ёрар,  
 Тошдай қотган бошни ёрар.  
 Ёмаганни ёндирап,  
 Чанқоқ дилни қондиради.  
 Уни айтмоқ осон эмас,  
 Айтиб кайтмок осон эмас.  
 Айтгин фақат бўлсанг ҳалол,  
 Туғри айтгин қилма увол.  
 Шу сўз бордир, бордир инсон,  
 Шу сўз билан жумла жахон.  
 Айтмай аввал инсон бўлгин,  
 Шу сўз учун қурбон бўлгин,  
 Faфлат босмай, бўлгин огоҳ.  
 Бу сўз хақдир, бу сўз "Оллоҳ".  
 Мен шу сўзни излаб келдим.  
 Гоҳо топдим, гоҳ йўқотдим  
 Мен шу сўзни излаб кетдим.  
 Бақо сари кундай ботдим.



## ТАШҚАРИДА ЙИГЛАЙДИ ШАМОЛ

Ташқарида йиглайди шамол,  
 Деразамга бошини урар,  
 Нозик чечак бўлганча беҳол  
 Нафис билур гулдонда турар.  
 Увилларкан шамол тинимсиз,  
 Чечак кетмоқ истар бу ердан.  
 Ох, қувончи бўларди чексиз,  
 Шишага ҳам жон кирса бирдан.  
 Деразанинг тугар бардоши,  
 Юборади ўзини очиб  
 Кувган каби кимдир аёвсиз.  
 Шамол кирар хонамга қочиб,  
 Урилдию гулдонга кетди.  
 Чечак билан шўх ўйнаб, учиб,  
 Шишага ҳам жон кирди лекин.  
 Бу жонидан юборди кечиб.  
 Билур гулдон синади чил-чил.  
 Ва шу билан бошланди сукўт,  
 Шамол гойиб. Ерда ётар гул,  
 Ташқарида тарқалар булат.  
 Ёмғирдан сўнг очилган ҳаво  
 Юзларида кўринмайди гард.  
 Бехос гулдон синиқларида  
 Сина бошлар нурлар ложувард.

ҚАНОТ

Бир замонлар менинг улкан қанотларим бор эди,  
Гурӯғлидек ёруғларим, Фиротларим бор эди.  
Ишонганим Алпомишлар учқур Бойчибор бор эди,  
Бугун менга қанот керак қани менинг қанотим.

Дардингизни Сино каби кўзингиздан англардим,  
Булбуллар навосини Навоийдан тинглардим.  
Яссавий ҳикматларин тасбех каби ағдардим,  
Бугун менга қанот керак қани менинг қанотим.

Бухорийни ўстирибдир, шу тупроқни ўпарман,  
Олтин бешик авлодларни ўз юртимдан топарман.  
Қачонгача яшайверар юрагимда ук-армон.  
Бугун менга қанот керак, қани менинг қанотим.

Кеча ўтди Чўлпонимнинг кундузларин изларман,  
Самарқандда Навоийнинг кўт-изларин изларман  
Ҳайиқаман, сесканаман Темур руҳин изларман  
Бугун менга қанот керак, қани менинг қанотим.

Замон ўтиб қанотларим толиқибдир, толибдир,  
Сина-сина орзулари кафтдек бўлиб колибдир  
Улкан қанот авлоди бу кўлим бугун ғолибдир,  
Бугун менга қанот керак, мана менинг қанотим

ДЕХҚОН ВА ТУПРОҚ

Осмон тирқишидан увиллаб аёз,  
Ёмғир тиниб, қорлар келар учқунлаб  
Деҳқон умрин ямламай хазм этди ёз,  
У далада қолар энди уч кунга.

Лекин бу уч кунлар такрор ва такрор  
Айланиб, айланиб келаверади.  
Деҳқоннинг умрини совуриб беор  
Қиши шамоли қорли елаверади

Аччиқ изтироблар аёздай аччиқ,  
Бир сиқим тупроқ турар қўлида.  
Дала деҳқон каби бағри кенг очиқ,  
Деҳқон умри тўкилди далада.

Ер-угут, ер-кўтлуг, ерdir бебаҳо,  
Ер бизни боқади, деймиз баралла.  
Лекин биз деҳқонни унутиб гоҳо  
Байрам хақида тўқиймиз ялла.

Қадоқлари фақат қўллариdamас,  
Она ер ўпади оёкларини,  
Баъзан у далага чиққиси келмас,  
Лекин ўйлар яна ҳар ёқларини.

Эл қатори яшаб ўрганган деҳқон,  
Элдан чиқмайман деб чиқар далага.  
Ерда ундин, ерда ўсдин, ерда ўлигим,  
Ердан чиқмайман деб чиқар далага.

## ТОНГГИ ШУДРИНГ

У ахир дәхқондир, у ахир дәхқон,  
Дәхқонга ер керак, фақат ер керак.  
Пешона шүрини ювиб кетувчи,  
Умрига арзирли меңнат, тер керак.

Дәхқонни Она Ер тушуна олар,  
Бу меңнат эмасдир, бу муҳаббатдир.  
Дәхқонга Она Ер ишона олар,  
Бу меңнат эмасдир, дилдан суҳбатдир.

Бир-биридан каммас икки заҳматкаш,  
Ер бўлсанг ер бўлар, дейдилар халқда.  
Унсиз сўзлашади икки меңнаткаш  
Бир-бирининг аримаган шўрлари ҳақда

## ПИКАССО КАБУТАРИ

Тумшугида зайдун баргини олиб,  
Ер шарини айланиб учар кабўтар.  
У кўрқмасдан қолоқдан қаноти толиб,  
Тоғлар, денгизларни ишончла ўтар.

Чўчитманг уни сиз, манзили узоқ,  
Мақсадга етолмай қийналар ҳамон  
У оддий қантармас, қуймангиз тузоқ,  
Қалбида яширин эзгу бир армон.

Шамоллар, булатлар тўсманнг йўлини,  
Толиққан қанотта бўлингиз тиргак.  
Одамлар, одамлар тўсманнг йўлини,  
Тинчлик ҳаммамизга, эмасми тилак.

## ХИЁНАТ

Иблизлар изғиган кечада  
 Бир аёл чиқади күчага.  
 Ҳовлисида мунғайған майса,  
 Садоқатни босиб кетар у  
 Ва эрининг камтар севгиси  
 Дастурхонни кўрик осиб кетар у  
 Ўти ёнган, чўғи ўчмаган,  
 Қчогидан хатлаб ўтади.  
 Ерда қолган тифи кўчмасдан,  
 Пичогидан хатлаб ўтади.  
 Орзулари қамалиб қолган,  
 Сандиқларга заррин сарполар,  
 Ташлаб чиқар ҳаёт беланганд.  
 Сумаклари тилло бешикни  
 Ташлаб кетди така илинган  
 Остонаси тилло эшикни  
 Излагани унинг муҳаббат  
 Учрагани рафлату-ишрат  
 "Кўчаларда муҳаббат эркин  
 Кўчаларда муҳаббат текин"  
 Сўқир аёл, йўлингдан қайтгин.  
 Бир оз ўйла ва ўйлаб айтгин.  
 Муҳаббатми эркин муҳаббат,  
 Муҳаббатми текин муҳаббат.  
 Муҳаббатнинг номини сотма,  
 Фоҳишасан десам тош отма.  
 Сен уйингдан - ватандан кечдинг  
 Тоза либос пок тандан кечдинг.  
 Биламан не кезар уйингда,  
 Билмайсан не кутар уйингда.  
 Очолмайсан энди эшикни,  
 Тебратмайсан энди бешикни.  
 Сандигинг кўтади аждаҳо бўлиб,

## ТОНГГИ ШУДРИНГ

Оғзидан чиқарыб аланга.  
Юрак бағри тутунга түлиб  
Йұлларингни түсіб кутади..  
Садоқатнинг ранглари сарғыш,  
Тикон бўлиб осиб кўтади.  
Тандирингда ёпилар карғиш,  
Учокларинг сени тұтади  
Иблизлар изгиган кечада  
Аёллар чиқмангиз кўчага

### АЛЛА

Кўкда ой кўринди  
Олтин беланчак.  
Майсалар ухлайди,  
Ухлайди чечак.  
Тун-ром кўрпаси,  
Ухлагин кўзим.  
Сен ҳам ором олгин,  
Киприкларинг юм.  
Ҳамма ухляяди  
Сен - мендан бўлак.  
Нега ухламайсан  
Безовта юрак.  
Онам алласини  
Эслайман бир зум  
Уйқумас, согинчдан  
Ёшланар кўзим.  
Ухлатайин дея  
Бешта боламни.  
Такрор-такрор айтдим  
Билган алламни.  
Уйларимда онам  
Алласи елди.  
Мен ҳам алла тинглаб  
Ухлагим келди.

## ТАҚДИР

Үттиз йил яшбман, бу үттиз йилда  
 Қанча аламларни чайнамай ютдим  
 Кангча аччикларни едим, лек доим  
 Одамлардан бирон шириң сүз күтдим.

Нордон таъналарни эшилдим күпроқ,  
 Ёлғон мақтоловларни эса олмадим.  
 Билмадим, мен тотиб күрмаган яна  
 Бирор туйғу қолдимикан, ёки қолмади.

Олдимизда очиқ түкин дастурхон,  
 Бу беш кунлик дунё байрамдир аниқ.  
 Билиб бўлмас, бу биз севган ёруғ оламнинг  
 Хуш олувчи шароблари сув каби тиник.

Турмуш неъматлари аччиқми - чучук,  
 Олдимга қўйилар, давомий базм.  
 Уларнинг барисин юракка едим,  
 Бариси юракда бўлади ҳазм.

Томирда қон эмас, қоришиб оқар,  
 Ёлғону хақиқат, муҳаббат, нафрат.  
 Оҳ бу ҳаёт менга қанчалар ёқар,  
 Ёқмас ташлаб кетмоқ буларни факат.

ЗАМОНАМИЗ АЁЛЛАРИГА

Қаддин тиклаётган мардона халқим,  
Тонгларга туташган кунинг муборак.  
Жонни ларзага солишга қодир,  
Ёрқин овозларинг, унинг муборак.

Атрофларингдә дўстлар, йўлдошларинг бор,  
Порлоқ кунлар сари йўлинг муборак.  
Дилларда чаманлар очилаётир,  
Шабнамга чалингган гулинг муборак.

Энди кунларингмас, ҳафталарингмас,  
Йилларинг байрамга айланаветир.  
Ташвишларни бошдан ошириб ташлаб,  
Аёлларинг байрамга шайланётир.

Бу байрам мухаббат байрами асли.  
Бу йил байрамидир ишқнинг, вафонинг,  
Бу байрам садоқат байрами асли.  
Юзларида яширинган ҳаё ибонинг.

Тўйларни бошлаган ялла байрами,  
Кўшиқлар байрами муборак бўлсин.  
Оналар байрами, алла байрами,  
Бешиклар байрами муборак бўлсин.

Байрам тўй бордирки, муборак бордир,  
Яхшиларга яхши бир тилак бордир.  
Тилай безагиз дурларга тўлсин,  
Қалбингиз илоҳий нурларга тўлсин.

Бошлаган ишингиз барорли бўлсин,  
 Юрган йўлларингиз қарорли бўлсин,  
 Юрар йўлингизда чечаклар унсин,  
 Сизга тош отганинг қўллари синсин,  
 Оллоҳ дилларингиз нурафшон қиласин,  
 Оллоҳ, йўлингизни нурафшон қиласин.

### ЭЪТИРОЗ

У шоир эмасдир, асло шоирмас,  
 Шу гапни уқтириб шогирдларимга.  
 Дебсан шеър ўкишга хатто қодирмас,  
 Гард қўшибсан ўзинг дил гарларингта.

Шоирлигим ҳали ўзим тан олмам,  
 Парво қилмам, одамлар нима деса дер.  
 Мен агар оламга машҳур бўлсам ҳам,  
 Сенинг даврангда ҳеч ўкимасман шеър.

Шеър мансаб эмас-ку, шеър бойлик эмас,  
 Қалбим сўзларига куй басталадим.  
 Шеър дардим.  
 Мен эса шу дард билан масти,  
 Ҳатто кўролмабсан шу хасталигим.

Ичингни кемирган илон нимадир,  
 Нечун кузатасан йўқ борлигимни.  
 Шоирлигим ёқмаса-да лекин барибир,  
 Инкор этолмассан Дилбарлигимни.

## ТОНГ

Кундузни севарди навқирон ҳаёт,  
 Унга багишлиди буткул ўзини.  
 Лекин тутамади бу ишкий баёт,  
 Умри кекса экан кундузниңг.  
 Ҳаёт қора кийиниб олди,  
 Аза очди ўтган кундүзга.  
 Ой чеккада мунграйиб қолди,  
 Аламларин сочди юлдуздай.  
 Мени уйқу элитмиш андак,  
 Уйғотди шитирлаб этаклар.  
 Оқ лиbosда оппок келинчак,  
 Ҳаёт тонги келар етаклаб.

## ШОИРНИНГ ЮРАГИ

Қалам билан ёзиларми шеър?!  
 Асло!!!  
 Бу қаламмас,  
 Бу оддий ханжар.  
 Юрагимнинг туби-тубида  
 Яшириңган туйғулар излар  
 Тилка-тилка бўлиб юрагим  
 Қизғона-қизғона туйғулар берар.  
 У эса шошмасдан, батартиб,  
 Таржима қиласда сўзларга,  
 Фикрдан ип тортиб  
 Мунчоқдай терар.  
 Шунинг учун шоир юраги  
 Сизникига унча ўхшамас  
 Атиргулга ўхшайди кўпроқ,  
 Тилка-тилка, япроқ-япроқ.

ИНСОННИ ТУШУНИШ

Билмоқ учун осмонинг осмонлигини,  
Унга учмоқ керак.  
Юракни қанот қилиб,  
Уни кучмоқ керак.  
Ушлаб кўрмоқ керак,  
Чақмоқ қамчисин.  
Тотиб кўрмоқ керак,  
Ёмғир томчисин.  
Билмоқ учун уммоннинг уммонлигини  
Унга ботмоқ керак.  
Тош бўлиб тўлқинларга,  
Ўзни отмоқ керак.  
Тушуниб тўфондек қилиқларини,  
Тилга солмоқ керак.  
Кўпни кўрган балиқларини,  
Билмоқ учун заминнинг заминлигини.  
Унга уруғ бўлиб,  
Кўмилмоқ лозим.  
Ва унинг бағрида,  
Туғилмоқ лозим.  
Сўнгра томир отиб,  
Ўсишинг керак.  
Келган балолардан,  
Тўсишинг керак.  
Билмоқ учун инсоннинг инсонлигини  
Нима қилмоқ керак,  
Не қилмоқ керак?  
Инсони тушуммоқ,  
Жуда ҳам қийин  
Яхсиси бу саволдан  
Чекинмоқ керак.

ҮЧИРГИЧ

Хатоларни ўчира олишга қодир,  
Ўчиригич бўлса-ю топиб олсангиз.  
Ёки сотар бўлса бирор савдогар,  
Нархини келишиб сотиб олсангиз.

Қанча туарар эди битта ўчиригич,  
Нари бўлса бир умрлик савобингта тенг  
Бундай арzonига ким ҳам кўнарди  
Ўша савдогарга бориб раҳмат денг.

Хатоларни ўчириб бўлманг хотиржам,  
Яшириб сақдангиз кўз кўрмас жойда.  
Ҳали улгурмаган хатолар учун,  
Ҳали керак бўлар, беради фойда.

ВАҚТ ЎТАР

Шучаки ўтмайди  
Сиқади, эзади, қийнайди бизни  
Ва яна юпатар, кўндирап, алдар,  
Ҳеч кимга кўрсагмай йўқотар изни.

Вақт ўтар

Шунчаки ўтмайди  
Ҳар йўллар топади бизни синашга.  
Сочинг оқарганин сезмай қоларсан,  
Имкон ҳам тоцибди бошинг силашга.  
Вақт ўтар.

Вақт шошар, кутмас, тўхтамас.

Йўл-йўлакай бажарган юмушларин кўр.  
Не ишлар қиларди агар тўхтаса.  
Йўқ!!!

Бундай даҳшатни этмам тасаввур.  
 Қүёш ёна-ёна нур таратгандай  
 Ер борликка сочади шовқин.  
 Бу шовқин ҳаммани тортар домига  
 Уммон каби чайқалади, уради тўлкин.  
 Вакт ўтар.

### ҚУЛАЙСИЗМИ ТОГЛАРДАЙ ЖЎШИБ...

Тоғларим тошин ҳам камситманг сира,  
 Тоғларим қалбига солмангиз алам.  
 Тоғларсиз гўзалик тунд фира-шира,  
 Гузаликнинг ўзи тоғларга қарам.

Кўрқдингизми ёки тубсиз жарликлар,  
 Мункайган қоялар важоҳатидан.  
 Силсилаар тўғсан кўп гўзаликлар,  
 Сизга кўринмабди парда ортидан.

Тонг пайти офтобнинг тиниқ нурлари,  
 Қорли чўққиларга суртганда зарҳал.  
 Этакларда турфа чечак, гулларнинг,  
 Кўрганмисиз нафис рақсин ҳеч маҳал?

Оппоқ қор рўмолин сидириб бошдан,  
 Дарёга оқизиб юборган қоя.  
 Жилваланса нурни олиб қуёшдан,  
 Бунинг таърифи ҳеч топмас ниҳоя.

Чўққига ёнма-ён айтсангиз қўшиқ,  
 Жўр бўлмасми улар акс-садо бўлиб?!  
 Ҳайқириб пишқирган сойлардай тўлиб,  
 Қуйлай олдингизми тоғлиқдай жўшиб?!

## КҮЗ ЮММОҚ ОСОНМАС...

Қалб күзини очмок учун күзларингни юм.

Күз юммоқ осонмас,

Асло осонмас.

Ҳаётнинг ширин ташвишларидан

Сизни ноз-неъматла сеҳрлаб олган.

Бу дунёнинг боғубеҳштларидан

Қалб күзини очмоқ учун күзларингни юм

Күз юммоқ осонмас.

Ширин сўз билан.

Ширин бўса билан севгиман дея

Қўлларингга узук таққандা никоҳ

Бир умр ўй билан ўтади умринг,

Унинг кимлигидан бўлолмай огоҳ

Күз юммоқ осонмас.

Лекин кўз юмгин.

Англасанг ҳам, англолмадим де,

Тушунсанг ҳам, тушунмай тургин

Кўнгли бўшлиқ қилаверма кўп,

Ечилмасдан қолса ҳам тугун.

Кўнгли бўшлиқ энг ёмони шу.

Недан кўз юммоқни урганиш қийин.

Ҳаёт камалаги ажаб жилвакор,

Ҳаёт шаббодаси нақадар майин.

Кўз юммоқ осонмас,

Лекин кўз юмгин.

Кўз юмгин, кўз юмгим, яна кўз юмгин,

Бағритош бўлолгин ўзинг-ўзингга.

Кўнглингда кичкина тош пайдо қилгин.

Шу тош гавҳар бўлсин қалбинг - кўзингга,

Қалб кўзи очмок учун кўзларингни юм.

О, КҮНГЛИМ

Күз олдинда яшнаб, пирпираб учган,  
Капалакка мунча қиласан ҳавас.  
У гулдан бу гулга дамо-дам күчган  
У оддий ҳашорат, мужиза эмас.

Чириган ҳазонлар ичра неча ой  
Судралиб яшади, ундан сүраб күр.  
Тош ғумбак ичида қанча умрини,  
Қамалиб утказди, пешонаси шүр.

Ҳаммаси бир кунлик рўшнолик учун,  
Қанчалар машаққат, қанчалар азоб.  
О күнглим, хавасининг кенглиги учун  
Азбларга сен ҳам берармидинг тоб.

Ишонмайман ҳали сўрмасдан туриб,  
Чидармидинг чириган ҳазонлар ичра.  
Ёки капалакка айланмай, ёриб  
Ғумбакни портлатиб қиласдинг парча.

О күнглим, шукур қил капалак эмас,  
Менинг содда күнглим бўлолганинга.  
Мен эса хурсандман, ҳар қалай ўзинг,  
Шундай гўзалликни кўролганингта.



## ТОНГТИ ШУДРИНГ

### СУЯНЧИҚ

Аввал соз кирди.  
Қўлида ўткир қалами билан.  
Секингина томофин ққирди  
Фикрни уйғотди  
саломи билан.  
Бирдан сапчиб кетди,  
Чақнади Фикр.  
Сўзни охиригача эшитмай туриб,  
Кўчага отланди шошилганича.  
Барча режаларин чеккага суреб.  
Қаерларга бормади Фикр.  
Излаганча керакли сўзни  
Ҳар оламга кирди бирма-бир.  
Не тоғларга урмади ўзни,  
Остонада туриб қолди Сўз.  
Ташрифидан бироз ўйланиб  
Шеърнинг бошланишин кутди тонгтacha  
Ялонғоч қаламга сўйланиб.

## ТОНГТИ ШУДРИНГ

Баҳор бўлсам,  
Гар Баҳор бўлсам,  
Этагимни ўпармиди Ер.  
Осмон бўлсам,  
Гар Осмон бўлсам  
Нур қуярми бошимдан Қуёш  
Дараҳт бўлсам,  
Гар Дараҳт бўлсам  
Сайрармиди қушлар бағримда.  
Шамол бўлсам, югурсам, елсам,  
Бўлардим учкур ва бебош.

Дарё бўлсам,  
 Гар Дарё бўлсам  
 Кетар эдим сахро оралаб.  
 Ҳеч булмаса асалариdek  
 Яшасайдим гуллар саралаб.  
 Қани энди шудринг бўлсайдим,  
 Тонг енгига ёзар эдим шеър.  
 Оҳ, мен қандай эркин бўлардим,  
 Бу одам нима деса дер.

## ЭРТАГИМ

Эртагим сирингни соч,  
 Нега бору йўқ экан.  
 Бойнинг кўзи доим оч,  
 Камбағаллар тўқ экан.

Эртагим кўй эскини  
 Нега бори, нега йўқ.  
 Ботирларни кўксини  
 Ростдан тешолмасми ўқ.

Эртагим кўп қадимсан,  
 Кимлар бору кимлар йўқ.  
 Душман келар одимлаб  
 Дўйстлар ўхлар, кўнгли тўқ.

Эртагим уйғотиб айт,  
 Эртак каби замон йўқ.  
 Эртакдаги ҳақиқат  
 Қачон бору, қачон йўқ

## МЕН БОРМАН

Мен бордирман борлар ичидә,  
Йүқоламан гоҳ йүқлар билан.  
Қораяман қоралар билан,  
Оқраман мен оқлар билан.

Оҳ бўламан, оҳлар ичидә,  
Севинаман севинчлар билан.  
Гул бўламан гуллар рақсида,  
Ўкинаман ўкинчлар билан.

Ким у, мендан шубҳаланмоқда,  
Нега айри назар ташлайди.  
Яшаяпман ҳаммага ўхшаб,  
Ҳамма менга ўхшаб яшайди.

\* \* \*

Аёл чиқар далага,  
Ёришади энди тонг.  
У билан йўлга тушар,  
Нон тугилган дастурхон.  
Ёнида кетмоқдадир  
Уйқусираф боласи.  
Дудоғида кетмоқда  
Тугамаган алласи,  
Бир қўлида гўдаги  
Бир қўлида ел бешик  
Ортидан секингина  
Оғзини қулфлар эшик  
Кечгача йўлларида  
Тўрттда кўзини тутиб,  
Уйи уни кўтади  
Остонаси ғам ютиб.

## ОТАЖОН

Отажон, сиз эккан боф яшнаб күкарди.  
 Бошу узра яшил байроқ күтарди,  
 Майсалар түшалиб йўлларингизда.  
 Анвойи гуллардан даста тутарди,  
 Шу йўлларда қолган изингиздурман,  
 Орзунгиздек ёргуғ юзингиздирман,  
 Отажон, келибди биз кутган кунлар,  
 Бофингизда қушлар баҳт куйин куйлар.  
 Бу кунларни кимлар орзу қилмайди,  
 Бу кунларга ҳавас қилмайди кимлар.  
 Ҳаваслар ичида ҳавасингизман,  
 Дауда титраган овозингизман.  
 Ким сиздек боф экмиш машақат билан,  
 Қалбда бирдай меҳр ва шафқат билан.  
 Келажакка устоз мураббий бўлиб,  
 Зиё, нур бердингиз не заҳмат билан.  
 Шу нурдан бир тола соғ нурингизман,  
 Тоғлардан юксалган фууриңгизман.  
 Отажон, сиз каби устоз бўлдик биз,  
 Ҳаёт қўшиғига ҳамроз бўлдик биз.  
 Сиздек улуғликни орзулар ўилиб,  
 Гоҳо куй, гоҳида овоз бўлдик биз.  
 Оҳангি туганмас қўшиғингизман,  
 Орзуларга тўлган борлиғингизман.  
 Отажон, мен сизга қўшиқлар айтсан,  
 Қалбимни қўшиқقا қўшиблар айтсан.  
 Овозимни қўйиб авж пардасида,  
 Қанча айтсан камдир, жўшиблар айтсан.  
 Бу кунлардан сархуш хушҳолингизман,  
 Қалбингиздан ўсган ниҳолингизман.

ЙҮЛДА

Чайқалади яшил буғдойзор,  
Каттагина қишлоқ ёнма ён  
Хар юракда яшайди озор,  
Бутун ким омондир, эрта ким омон.

Шаҳар томон узалган умид,  
Торайиб бормоқда ёлғизёк йўл,  
Йўл ёқаси очиқ буғдойзор,  
Буғдойдан ҳам қўнғирбошлар мўл  
Қовжираб пишади қўнғирбош,  
Чекка уватларда мунгайиб  
Кута кута бошоқларнинг сарғайишини,  
Одамлар етилар сарғайиб. . .

Ҳали замон яхши кун келар,  
Чайқалади ям-яшил бошоқ.  
Қўнғирбошни туяр келилар,  
Чайқалади қўнғиртус қишлоқ.

ЧИЗФИЛАР

Ёлғиз япрогини бағрига босиб  
Йўл четида турар  
Дараҳат интизор.  
Не кўтар,  
Олдида унинг зимистон,  
Ортида қолгани кузу, ёз, баҳор.

Тун асли кундуздир  
Йўқотиб қўйгандир  
Ёлғиз қуёшин.  
Юлдузлар кўз ёшидир.  
Куйиб куйиб йиглаёттан  
Туннинг кўз ёши.

Нигоҳинг қарғайди  
 Бағри тош дея,  
 Үкінмай деб, топиб  
 Бир иложини  
 Сүзлайман:  
 - Хоҳласанг, шу бағир тошим  
 Бир кун безагайдир баҳтнинг тожини.

Айланма йўлларнинг четида,  
 Энг доно дараҳтлар анқайиб.  
 Қўшилолмай йўловчиларга  
 Туришар ҳайкалдай қаққайиб.  
 Иложини излаб топардик,  
 Йиғишириб қўйиб ҳазилни.  
 Юришарди шу кўчаларда,  
 Билишганда бирор манзилни.

Бу гул алданганин билди жуда кеч,  
 Тугиб қўйгач қатор фунчаларини.  
 Кейинги баҳорини кўтади энди,  
 Баланд тутиб митти муштчаларини.

Бир дардим бор, кўксим ичра не йилларки сақланур,  
 Хаста кўнглим ишқ майдан ичса балки соғланур.  
 Дўстим менинг ҳамдардимдир, кўзларингдан кўраман,  
 Дилинг хуфтон бўлса ҳамки қароғингда сақланур.

Мен ўзингга ошиқдирман, менга ёр бўлмас ўзга  
 Сенингсиз бу руғ олам ҳеч даркор бўлмас ўзга.  
 Ишқ, деган тилда эмас дилда бор бўлса яхшидир,  
 Изхор учун сўз излаб дўстим бозор бўлма сўзга.

ДИЛБАР ДОНАБАЕВА

# ТОНГГИ ШУДРИНГ

ШЕЪРЛАР

Муҳаррир:	Н. Ҳошимов
Бадиий муҳаррир:	М. Султонов
Тех.муҳаррир:	Ш. Ҳошимов
Дизайнер:	Р. Тошматов
Оператор:	Д. Ражабова
Мусаҳҳих:	И. Қўзиев

"Lider-press" нашриёти - 2009 йил.  
«Дизайн-принт» МЧЖ ЎИЧК босмахонасида  
оффсет усулида чоп этилди. Буюртма № 172.  
Адади 2000 нусха. Хажми 4,25 б.т. Ўлчами 60x84 1/16

100100. Тошкент шаҳри, Бобур кӯчаси, 22-уй.

Тел/факс -8-371-255-34-28

E-mail: [dizayn\\_printpro@mail.ru](mailto:dizayn_printpro@mail.ru)

